

事月正天文保五行順四時觀其進退以自  
照正其行自知得失矣

太平經鈔丙部卷之三

太平經鈔丁部卷之四

胞胎陰陽規矩正行消惡圖

外四

神人語真人內子已明也損子身其意得也  
其外理自正瞑目內視與神通靈不出言與  
道同陰陽相覆天所封長生之術可開眸子  
無強腸宜和弘天地受和如暗擊欲知其意  
胞中童不食十月神相通自然之道無有上  
不視而氣宅十二重故反嬰兒則無凶老還  
反少與道通是故畫像十二重正者得善不  
肖獨凶天道常在不得喪亡狀如四時周反  
鄉終老反始故長生也子思其意無邪傾積  
德累行道自成才不如力道歸其人苟非其  
人道不虛行天道若風默居其傍用之則有  
不用則亡賢者有里不肖有鄉死生在身常  
定行天無有過人自求喪詳思其意亦無妄  
行天與守道力行故長生人不肯為故死傾  
記吾戒子道傳其人則易行古者聖賢傳道  
飲血為盟天道積重愚人反輕道乃萬物之  
師也得之者明失之者迷天地雖廣大不遺  
失毫釐賢知自養比與神俱語是乃陰陽之

統天地之樞機也古者聖賢深知之故以自  
表殊天道之要也內以治身外以消災不當  
為之乃與天地同憂分別四治夫帝王之士  
失臣皆當老少子本非理世人也吾見天氣  
間者比連不調或過在仕臣失實今使時氣  
不調人君不明災害並行道入亦傷今天地  
三光尚為其病故無正明道士於自迷獨得  
不傷故吾雖獨蒙天私久存常不敢自保初  
少已來事師問事無能悉解之天師解決其  
要意恐無復得知之夫治者有四法有天理  
有地理有人理三氣極然後歧行萬物理也  
願聞其意天理者其臣老君乃父事其臣也  
夫臣卑何故師父事之哉但位卑道德尊重  
師父事之者乃師其道德當以合策而平天  
下也地理者友事其臣若以同志同心者陰  
順母子同列同胞同憂臣雖位卑其德和平  
君之治人治者卑其用臣小小象父生子  
子小小未能為父作策故亂小矣夫治天下  
者視天下之臣皆師父也故父愛其子何有  
危時師父皆能為其子解八方之患難何有

失時象地理者天下之臣皆君之友也夫同志合策為交同憂患欲共安其位地者順而承上悉承天意皆得天心何有不安時乎象人理者得中和之氣和者可進可退難知象子少未能為父計也欺其父也臣少未能為君深計故欺其君少者生日月少為學又淺未有可畏故欺也故治少亂矣象蛟行理者無理義萬物者少知無有道德夫蛟行萬物無有上下取勝而已故亂敗矣象天理者人好生不傷地理者順善而成小傷象人理者相利多欲數相賊傷相欺殆象蛟行理者終無成功無有上下取勝而已天地之間常悉使非其能強作其所不及而難其所不能時觀於不能為不能言不悅而教之反就責之使寬結多忿爭訟民愁苦困窮即而仰呼天誠寬結氣感動六方故致災變紛紛書積非一不可卒除為害甚是即告天下之人心意矣終反無成功變怪不絕太平之氣何從得來哉故不能致太平氣咎正在此天下萬物各自有宜當任其所長所能為所不能為者

而不可強也萬物俱愛陰陽之氣比若莫不能遊高山之上及其有水不限高下皆能去矣大木不能無上生於江海之中是以古者聖人明王之受事也五土各取其宜其物得好且善而各暢茂國家得富今宗廟重味食之天下安平無疾苦惡氣休止不行而為害如人不相其土地而種植之即萬物不竟天年皆壞究結不解因而天終上感皇天萬物不收國家貧極食不重味宗廟飢渴天下愁苦人民更相殘賊君臣更相欺殆外內殊辭咎正起於此大害之根危亡之路也得書讀之常若不熟孰者志自知之不善思其志竟不精讀之雖得吾書亦無益也得而不力行與不得何異見食不食與無五穀何異見漿不飲渴可救乎此非愁他人還自害可不詳哉故聖人力思君子力學晝夜不息也猶樂象天轉運而不止百川流聚乃成江海子慎吾言天之受事各有法律今有可屬道有可為出或先或後其漸預見比若萬物始萌於子生於卯垂枝於午成於酉終於亥雖使預

見未可保也事各有可為至先景先見其事未對預開其路天之垂象也常居前未嘗隨其後得其人而開通得見祐助者是也不可不通行之無成功即非其人也是以為明證道審而言萬不失一但是其人明為其開非其人則閉審得其人則可除疾災異自消夷狄自降不須兵革皆自消亡萬物各有可為設張得其人自行非其人自蔽凡事不得其人不可強行非其友不可強取非其土地不可強種種之不生言不良內不得其處安能久長六極八方各有所宜其物皆見事事不同大人得之以平國中士得之為良良臣小人得之以脫身應天理上下和合天災除奸偽斷絕讖本文上古之人皆心開目明耳洞預知未然之事深念未然感動無情卓然自異未有不成之施所言所道莫不篤達不失皇虛之心思慕無極之智無極之言知人壽命進退長短各有分都常以陰陽合得消息上下中取其要與眾神有約束但各不得犯天地大忌所奉所得當合天意文書相白上至

天君天君得書見其自約束分明乃後出文使勿自怨中直自進不自聞音聲洞徹上下法則各不失期恐有不及未曾有不自責時常恐有非是督錄神相白未曾懈有過見退用故重復語勸及覆辭文宜不違所言是天之當所奉承神祇所仰皆如法常不敢息恐有不違所受非一皆當開心意恐違期神有尊卑上下相事不如所言輒見跡記憂心惻惻常如飢渴欲食天君開言知乃出教使得相主文書非一當得其意後各有信上古之人失得來事表裏上下觀望四方四維之外見其紀綱歲月相推神通更始何有極時星數之度各有其理未曾有移動事輒相乘無有復疑皆知吉凶所起故置曆紀三百六十日大小推算持之不滿分數是小月矣春夏秋冬各有分理漏刻上下水有遲快參分新故各令可知不失分銖各置其月二十四氣前後箭各七八氣有長日亦復七八以用出入祠天神地祇使百官承漏刻期宜不失脫之為不應坐罪非一故使晝夜有分隨日

長短百刻為期不得有差有德之國日為長水為遲一寸十分應法數今國多不用日月小短一刻八九故使老人歲月當弱反壯其年自薄何復持長時如使國多臣樞機衡舒遲後生蒙福小得視息不直有惡復見伐矣惟天地之明為在南方巳午同家離為正目當明堂之事日照明以南向北陽氣進遲亦不失常陰陽相薄以至子鄉寒溫相直照徹自然甚可喜生養之道少陽太陽木火相榮各得其願是復何事表裏相承無有失名上及皇耀下至無聲寂靜自然萬物華榮了然可知不施自成天之所仰當受其名機衡所指生死有期司命奉籍簿數通書不相應召所求神簿問相實乃上天君天君有主領所白之神不離左右其內外見敬亦不敢私承所上所下各不失時太陰司官不敢懈止正管門閣恐自言事輒相承為善為要道謀其姓名得教則行不失銖分上古之時有智慮無所不照無所不見受神明之道昭然可知亦自有法度不失其常從太初已來歷有長

短甚深要妙從古至今出歷之要在所止所成輒以心思候算下所成所作無不就并數相應繩墨計歲積日月大分為計今天地且大樂歲帝王當安坐而無憂民人但遊而無事少職五穀不復為前無有價直天下興作善酒以相飲市道尤極名為水令火行為傷於陽化凡人一飲酒令醉狂脉便作買賣失職更相鬪死或傷賊或早到市反宜乃歸或為奸人所得或緣高墜或為車馬所剋賊推酒之害萬端不可勝記念四海之內有幾何市一月之間消五穀數億萬斗斛又無故殺傷人日日有之或孤獨因以絕嗣或結怨父母置害或流災于孫縣官長吏不得推理叩宵呼天感動皇靈使陰陽四時五行之氣乖錯復早上皇太平之君之治今太和氣逆行蓋無故發民令作酒損廢五穀復致如此之禍患但使有德之君有教勅明令謂吏民言從今已往敢有市無故飲一斗者答三十論三日飲二斗者答六十論六日飲三斗者答九十論九日各隨其酒斛為論酒家亦然皆

使修城郭道路官舍所以諄修城郭道路官舍為大土功也土乃勝水以厭固絕滅令水不過度傷陽也水太陰也民也反使與王傷損陽精為害深矣修道路取與大道以類相占漸置太平考天地陰陽萬物上下相愛相治立功成名使心治一家使人不復相憎惡常樂合心同志令太和之氣日自出而大興平六極同心八方同計所治者若人意莫不皆響應而悅者本天地元氣合陰陽之位邪惡默然消去乖逆者皆順明大靈之至道神祇所好愛吾乃上為皇天陳道德下為山川別度數中為帝王設法度中賢得以生善意因以為解除天地大咎怨使帝王不復愁苦人民相愛萬物各得其所自有天法常格在不匿古者聖帝明王重大臣愛處士利人民不害傷臣亦忠信不欺君故理若神故賢父常思安其子子常思安樂其父二人并力同心家無不成者如不并力同心家道亂矣失其職事空虛貧極因爭鬪分別而去反還相賊害親父子分身血氣而生肢體相屬如此

况聚天下異姓之士為君師父手故聖人見微知著故重戒慎之夫師陽也愛其弟子導教以善道使知重天愛地尊上利下弟子敬事其師順勤忠信不欺二人并力同心圖畫古今舊法度行聖人之言明天地部界分理萬物使各得其所積賢不止因為帝王良輔相與合策共理致太平如不并力同計不以要道相傳及欲浮華外言更相欺殆逆天分理亂聖人之辭六極不分明為天下大災帝王師之失其理法反與天地為大仇不得神明意天下大害者也

人生備具陰陽動靜喜怒哀皆有時時未牝牡之合也是陰陽當主為生生之効也天道三合而成故子三年而行三三為九而和道究竟未知牝牡之合其中時念之未能施也天數五地數五人數五三五五而內藏氣動四五二十與四時氣合而欲施四時者主生故欲施生五五二十五而五行氣足而任施五六三十而強故天使常念施以通天地之統以傳類會三十年而免老當衰小止閉房

內天下鼓行之屬人象天地純耳其餘不能也故天地一日一夜共閏萬二千物盡使生夜則深晝則燥深者陰也燥者陽也天與地日共養此萬二千物具足也天之法陽合精為兩陽之施乃下入地中相從共生萬二千物其二千者嘉瑞善物也夫萬二千物各自存精神自有君長當共一大道而行乃得通流天道上下往朝其君比若人共一大道往朝王者也萬二千物精神共天地生共一大道而出有大有中有小何謂也乃謂萬二千物有大小其道亦有大小也各自生自容而行故上道廣萬步為法次廣千步為法其次廣百步為法其次廣十步為法其次廣一步為法凡五道應五方當共下生於地共朝於天共一道而行是以大道廣萬步容中道千步小道百步蹙道十步毛道一步物有大小各自容往來凡乃上受天之施反下生施地出當俱上朝天也故大道但可張不可妄翕也翕之輒不相容有不得生者或有傷死不得生出者今人絕無後代傷者傷人死者殺

人古者聖人不敢廢絕大道者觀天禁明也子以何天道得傷道者天也陽也主生德者地也陰也主養萬物多不能生即知天道傷矣其有不生者即知天克有絕者矣一物不生一統絕多則多絕少則少絕隨物多少以知天統傷夫道與者主生萬物悉生德興者主養萬物人民悉養無冤結

五書中善者使青為下而丹字何乎吾道乃丹青之信也青者生仁而有心赤者太陽天之正色吾道太陽仁政之道不欲傷害也天子者天之心也皇后者地之心也天心者主持正也天乃無不覆無不生無大無小皆受命生高故為天者至道之真也不欺人也萬物所當親愛其用心意當積誠且信但常欲利不害不負一物故為天也天帝王者天之子人之長其為行當象此夫子者當承父之教令嚴勅業而行之其事乃得父心志意可為良家矣如不承父教令其家大小不治即為貧家矣財反回去常苦不聚其事紛紛災變連起大得愁苦過在此矣古者帝王將

行先仰視天心中受教乃可行也夫皇后之行正宜土地地乃無不載大小皆歸中無善惡悉包養之皇后乃地之子也地之心也心憂凡事子當承象母之行若母過為孝子夫天地之與皇后相應者比若響之與聲於其夫小亦小夫大亦大若夫毫髮之間以母不相得志意古者皇后將有為皆先念后土無不包養也無不可忍無不有常以是自安與土心相得矣若失之則災變連起刑罰不禁多陰少陽萬物不茂過在此夫是二人正行者則神真見真道出賢明皆在位善物悉歸

國元氣陽也主生自然而化陰也主養凡物天陽主生也地陰主養也日與晝陽也主生月星夜陰也主養春夏陽也主生秋冬陰也主養甲丙戊庚壬陽也主生乙丁己辛癸陰也主養子寅辰午申戌陽也主生丑卯巳未酉亥陰也主養亦諸九陽也主生諸六陰也主養男子陽也主生女子陰也主養萬物雄陽也主生雌陰也主養君陽也主生臣陰也主

養天下凡事皆一陰一陽乃能相生乃能相養一陽不施生一陰並虛空無可養也一陰不受化一陽無可施生統也陽氣一統絕滅不通為天大怒也一陰不受化不能生出為大咎天怒者陽不好施無所生反好殺傷其生也地所咎在陰不好受化而無所出養長而咎人反傷其養長也天不以時雨為惡凶天也地不以生養萬物為惡凶地也男不以施生為斷天統女不以受化為斷地統陰陽之道絕滅無後為大凶比若天地一旦毀而無復有天地也是故聖賢好天要文也天者眾道之精也賢者好道故次聖賢者入真道故次仙知能仙者必真故次真知真者必致神神者上與天同形合理故天稱神能使神也神也者皇天之吏也神人者皇天第一心也天地之性清者治濁濁者不得治清精光為萬物之心明治者用心察事當用清明今神人真人仙人道人聖人賢人人民人奴婢皆何象乎然神人者象天者動照無不知真人者象地者直至誠不欺天但順人所種

不易也仙人者象四時四時者變化凡物無  
 常形容或盛或衰道人者象五行五行可以  
 卜占吉凶長於安危聖人者象陰陽陰陽者  
 象天地以治事合和萬物聖人亦當和合萬  
 物成天心順陰陽而行賢人象山川山川主  
 通氣達遠方賢者亦當為帝王通達六方凡  
 民者象萬物萬物者生處無高下悉有民故  
 象萬物奴婢者衰世所生象草木之弱服者  
 常居下流因不伸也奴婢常居下故不伸也  
 故象草木故奴婢賢者得為善人善人好學  
 得成賢人賢人好學不止次聖人聖人學不  
 止知天道門戶入道不止成不死之事更仙  
 仙不止入真成真不止入神神不止乃與皇  
 天同形故上神人舍於北極紫宮中也與天  
 上帝同象也名天心神神而不止乃復踰天  
 而上但承委氣有青聲教化而無形上屬天  
 上憂天上事神人已下共憂天地間六合內  
 共調和無使病苦也  
 願聞絕彌彌遠六極天地之間何者最善三  
 萬六千天地之間壽最為善故天第一地次

之神人次之真人次之仙人次之道人次之  
 聖人次之賢人次之此八者皆與皇天心相  
 得與其同意并力是皆天人也天之所欲仕  
 也天內各以職署之故思慮常相似也是天  
 所愛養人也天者大貪壽常生也仙人亦貪  
 壽亦貪生貪生者不敢為非各為身計之天  
 法垂象上古聖人常象之不敢遠離也故厭  
 不祥斷狡猾使妖臣不得作者皆由崇天法  
 而為之欲使陽氣日興火大明不知衰時者  
 但急絕由金氣勿使王也金氣斷則木氣王  
 火氣大明無衰時也何謂也天若當絕兵兵  
 者金類也故急絕之帝王戒賜兵器與諸侯  
 是王金氣也金氣王則木衰木衰則火不明  
 火不明則兵起之象火者君象能變四時榮  
 感為變最效天法不失銖分王者居家主修  
 田野治生見之會當有四者不賜恩愛不下  
 加民今赤子無以訟盜當奈何見賢者賜以  
 文飢者賜之以食寒者賜與衣賢者何故賜  
 與文字文者生於東明於南故天文生于東  
 北故書出於東北象虎有文在寅龍有文在

辰負而上天離為文章在南故三光為文日  
 出於東盛於南天帝王象之為法天有三  
 皇地有三皇人有三皇天有五帝地有五帝  
 人有五帝天有三王地有三王人有三王天  
 有五霸地有五霸人有五霸何謂也天有三  
 皇若三光地有三皇若高下平人有三皇若  
 君臣民天有五帝若五星地有五帝若五嶽  
 人有五帝若五歲天有三王謂三光五霸為  
 五嶽與地皆同天之三皇其優者日中者  
 月下者星地之三皇優者五嶽中者平土下  
 者田野人之三皇優者君中者臣下者民凡  
 人乃有大罪六不可除或身即坐或流及後  
 世然人積道無極不肯教人求生罪不除也  
 積德無極不肯教人守德養性為謹其罪不  
 除積財億萬不肯救窮周急使人飢寒而死  
 其罪不除知有道而反賤道而不肯力學以  
 自救或得長生在其天統先人之體而反輕  
 不學而死乃自究罪不除也天生人幸使人  
 人有筋力可以自衣食而不肯力為反使飢  
 寒負先人之體而輕休其力而罪不除強弱

人物以中和為仇其罪不除此六大罪天惡之不可除也吾將去有期戒六子一言大道乃洞無上無下無表無裏守其和氣名為臣子近求即大遠求即失故君王善為政者以腹中始起真能思道理自得矣近在習心散滿四海古者聖人名要道古者聖人之教帝王也深思遠慮閉其九戶休其四肢使其混沌比若環無端如胞中之子而無職事乃能得其理吾道悉以是為大要天寶其傳焉

○ 太平經鈔丁部卷之四

太平經鈔戊部卷之五

外五

以天讖文支干相配長安國家以理所問乃求索洞通天地之因讖文一言萬世不可易天君疾多災愁苦夫皇天以四時為肢地以五行為體肢主盛衰體主規矩部此九神同流天下上下洞極變化難觀為天下重寶為眾門戶自有固常不可妄化順之者長吉亂之者天地乖忤天常讖法以南方固為君也日在南方為君火在南方為君太陽在南方為君四時盛夏南方為君五祀電在南方為君五藏心在南方為君君者當衣赤服火之行也君有變怪常與陽相應非得與地相應也日者最明為眾光之長故天常以日占君德盛衰人君之法當求與仁者同家有心者為理共理者常當行道而好生故東方者好生南方者好養不仁不可共理不明不可為君長東方木仁南方火明東方主道南方主德道主生德主養東方為文龍見負之南方為章故正為文章也東方為少陽之始生也故出東方南方太陽君之盛德明照少陽君

之家木生火也少陰為臣以義屈伏於太陽故金隨火屈折可欲為臣者常以義屈佐君欲為也故少陰為臣太陰為臣民流行不止故似水流行不息民者主當為國家主侯理生故水養木木者君之家也天之格讖少陽畏少陰故臣者反主錄國家主侯官屬也太陽畏太陰國有道德而君臣賢明則民從國無道德則民叛也是故理國之本民多為富民少為貧天格法分為六部東南上屬天萬物生皆上行蛟行人民皆出外屬天故天為之色外蒼象木內赤象火西北屬地萬物秋冬悉落下歸土人民蛟行至秋冬悉入穴而居故地之為色外黃白象土金內合水黑象北行也東方南方位尊上屬天主理為君長師父西北方屬地卑為臣為後宮為民者甲之後宮也甲天也王者之本位故為心星心星火也屬南方丙為火之長取其大明者也君之位也辛者丙之後宮甲者丙之父也故巳乃大皇后之宮也辛者配丙丙者甲之子故辛者小皇后之宮也丙者乃甲之適子